

REGIONAL NEWS

HEADLINES:-

1. MBSE-in Matric mekah Social Science exam nawn a ni dawn lo a ti a.
2. Chief Minister Pu Lalduhoman Mizoram State Policy Coordination Committee te hnathawh ber tur chu Bana Kaih- Policy enkawl a ni a ti.
3. Union Home Minister Amit Shaha chuan Citizenship Amendment Act (CAA) chu khua leh tui nih theihna chanvo pekna a ni a, khua leh tui chanvo inchhuhsakna a ni lo a ti.
4. Union Finance Minister Nirmala Sitharaman-i chuan Prime Minister Narendra Modia hnuaiha hun rei tak ngaihthah thawh hmarchhak state ten ngaih pawimawh an hlawh a ti.

<><><>

MBSE

Mizoram Board of School Education (MBSE)-in High School Leaving Certificate Examination kalpui mekah Social Science exam nawn a ni dawn lo a ti a.

Hemi chungchanga MBSE thuchhuahah Social Science chhanna paper endik dan tur chungchangah zirlai tute mahin an tawrh lohna tur leh hamthatna chang bik an awm lohna turin Examination Committeein hma a la ang, a ti s.

He thil duhawm lo tak thleng avanga zirlai te, zirtirtu te leh nu leh pate rilru chiaina leh hlauhthawna lo thleng zawng zawngah School Education Department leh MBSE chuan pawl a ti tak zet a. Zirlaite harsatna hrethiam takin MBSE chuan hma a la dawn a, tumah chia lo turin leh thlamuang taka awm theuh turin a chah a. Hetiang thil duhawm lo hi a thlen nawn tawh lohna turin hma a la zel dawn a ti bawk.

<><><>

MIZORAM STATE PROJECT MONITORING COMIT

Mizoram State Project Monitoring Committee chu an Chairman Pu Lalduhoma, Chief Minister hovin CM Conference Hall-ah an thukhawm a, an hnathawh dan tur thil pawimawh hrang hrang te an rel.

Chief Minister chuan, mipui sawrkar din an tum tlat tih sawiin, hmasawna hnathawh mekte chak taka a kal a, hun tiam chhunga hna zawh anih thin theih nan leh hmasawna hmel thar hmuh thuai thuai theih nan he committee hi din a ni a ti a, hei hi Eirukna dona tha lutuk a ni, a ti.

He committee ah hian Party aiawhte, tlawmngaipawl aiawhte, kohhran aiawh thlengin member an ruat a, a tul angin member hi la ruat belh theih a ni, a ti a. An thuneihna pawh a zauva, dik taka hna an thawh phawt chuan state hian nasa takin a hlawkpui dawn a ni, a ti.

Vice Chairman Pu RL Rinawma chuan Project endik theih an khawnkhawm tawh te, endik dan kalhmang tur an duan te, team hrang pathuma an inthendarh dan te sawifiahin Member ten an rawtna hrang hrang pawh an sawi hi a ni.

Project Monitoring Committee te hian Mizorama hmasawna hna thawk mektu contractor zawng zawngte chu tha taka Monitoring Committee hi lo thawhpui turin a sawm a, mipuite pawh an khua leh veng a hnathawh mekte tha tawk lova an hriat chuan Project Monitoring Committee hnenah thlen thin turin an ngen a ni.

MIZORAM STATE POLICY

Chief Minister Pu Lalduhoma chuan Mizoram State Policy Coordination Committee te hnathawh ber tur chu sorkar policy Hand Holding Policy enkawl a ni a ti.

He thu hi vawiina CM Meeting Room Mizoram State Policy Coordination Committee thutkhawm, Chairman a nih anga a kaihruainaah Chief Minister hian a sawi a. Chief Minister chuan Mizoram State Policy Coordination Committee in concern department te hmalakna a tul anga an enpui tur thu te, thurawn pek te leh hmalakna kal kawppui theih chi te bakah central lama sum hnar zawn belh thlenga an thawh dawn thu a sawi a. Mithiam ber ber thlan khawm an ni tih member te chu hrihlin hnathawh dan awlsam leh rang, rintlak si hmanga sawrkar policy pui ber kalpui tuma theitawp chhuah turin a fuih a ni.

He hunah hian Mizoram State Policy Coordination Committee Vice Chairman Dr. KC Malsawmzauva, Adviser to CM ni bawk chuan hmalak dan tur an chhawp chhuah tlangpuite a sawifiah a. Hemi zawhah hian thil pawimawh hrang hrangte relin concern department tur te an thlang fel a, a rang lama thutkhawm pui ni se tiin an rel bawk a ni.

Mizoram sawrkar hian Hand Holding Policy atan sawrkar kumthar budget ah cheng vbc 200 a dah a, kumin hi Year of Consolidation a nih avangin Pilot Project angin kalpui phawt tur a ni tih vawiin thutkhawmah hian tarlan a ni.

<><><>

CBC

Ministry of Information and Broadcasting hnuiaia Central Bureau of Communication (CBC), Field Office, Aizawl te chuan Integrated Communication & Outreach Programme (ICOP) Government Aizawl North College Conference Hall ah an nei a, Prime Minister Narendra Modi kaihruaina hnuiaia hmasawna hrang hrang Seva Sushashan & Garib Kalyan leh SVEEP chungchang sawizauna hun hman a ni.

Govt Aizawl North College Assistant Professor Jerry Lalmuansanga chuan Seva Sushashan & Garib Kalyan & SVEEP chungchang kalkhawmte hrihfiain, he progamme hi India ram chhunga cheng mi zawng zawng ban phak tura chhawp chhuah leh chaktaka kalpui dan tur a nih thu a sawi a. Pu Jerry Lalmuansanga chuan Sawrkar laipui chuan vote a ngaih pawimawh thu leh vote hlutzia a hriat thu a sawi a, India khua leh tui diktak nihna nei techuan vote thlak ngai pawimawh tur in kalkhawm mipui te a chah.

He hun ah hian Public Rally leh Quiz competition neih niin lawman sem nghal niin. Daw-re-me, Drama Cultural Club Bawngkawn ten lam an en tir bawk

<><><>

AH&VETVY MINISTER

Animal Husbandry & Veterinary Minister Pu C.Lalsawivunga'n vawiin khan Thenzawl Vety farm tlawhin, Sa leh Bawnghnutea intodelh turin theih tawp chhuah a ni dawn a ti

AH&Vety Department changtu Pu C Lalsawivunga chuan Thenzawla AH&Vety farm tihchangtlun lehzual dan tur ngaihtuahin an hmalak mekna leh hmachhawpte a hmunah enin, Saa intodelhna tura hmanraw pawimawh ber te zinga mi chu ran chaw a intodelh hmasak a ni a ti a, fodder hi a tam thei ang ber siamchhuah tum niin Thenzawl Vety farm ah chak taka hmalak tum a ni, a ti. Mizorama bawng vulhtute harsatna sutkian nan Bana Kaih Policy kaltlangin ran vulhtute hnenah fodder pek chhuah a ni dawn a. Kut hnathawktuten fodder hi

anrawn phurh chhuah ngai lovin an bawng vulhna hmun thleng Department motor-in a phurhsak ang a, a fodder man chawi loin a phurhna atana petrol/diesel man chauh kut hnathawktute hian an chawi ang a ti.

Thenzawl farm-ah hian ran chaw fodder plantation neih mek zau zawng hi 15 hectare vel a ni a, hmarchhak state te zingah sawrkar hmalaknaa fodder plantation nei zau ber state a ni. Kumin atang hian nasa lehzuala hmalak tum niin tin 40 hmun vela zauah fodder plantation neih belh tum a ni a. Heng atanga ran chaw siam chhuah te hi Mizoram hmun hrang hranga bawng vulhna hmunah te sem chhuah a ni dawn a ni.

Thenzawl Vety farm ah hian se chi tha tihpunna tur buatsaih tum niin tender chhuah mek a ni a. Tunah hian pui ruk leh a pa pakhat dah mek a ni. Kel tihpun tumin nasa takin hmalak a ni bawk a. Rajasthan atangin kel chi lian chi sirohi leh beetal lakluh a ni a. Kel chi tha, kum khatah no vawihnih tal nei thei tur leh a pumraw lian tha siam chhuah tumin phai atanga kel lian chi an lak luh te leh Mizo kel vulh thin panngai te inthlahpawlh tir an ni a. Crossbreed hi a tahtawl a tih chhunzawm zel tur niin an that tawk leh tawk loh zir chiang a, enchhinna neih chhunzawm zel a ni dawn tih Department hotuten an sawi a ni.

Zo Vawk a ral loh nan Vety Department hian Thenzawl farm-ah engemaw zat an vulh mek bawk a. Zo vawk hi Mizo pi pu ten an lo vulh thin, Mizoram mil a nih avang leh vulh a hautak loh vang te, a sa a tui bik avang tein mipui nawlpuiin an vulh uar lehzual theih nan Department chuan tan a la a ni. (CORR)

<><><>

KHAWZAWL

Khawzawl Krishi Vigyan Kendra leh ICAR-Central Potato Research Institute, Shillong te tangkawp chuan Khawhai khua- Tawitawzawl Zauah 'Alu chin enchhinna hun' an hmang a. He hun hi Dr Malsawmkimi, Sr Scientist and Head, KVK Khawzawlin kaihruaiin; CPRI, Shillong atangin Senior Scientist Dr Ngursangzuala leh Pi Lalhmachhuani, District Development Manager, NABARD te pawhin an hman pui a ni.

Tawitawzawl zauah hian tunhmain Alu an ching ngai loa. January 2023 atang khan KVK chuan Kufri Megha chu CPRI nen tangkawpin an lo chin tir tawh a. Zirtirna te pein, a hmunah an enkawl pui bawk a. A bul tanna atan mi 4 in an chin hnuah, December 2023 atang khan mi 20 te chin tir leh an ni a. Hectare 18 vela zauah Alu chin a ni a, Alu quintal 105 chin zingah hian - quintal 75 hi IARI(ICAR) hnuaiami a ni a, quintal 30 hi CPRI Shillong kal tlanga chin a ni thung. Variety an chin tir hi thlasik leh nipuia chin chi Kufri Jyoti, Kufri Pukraj leh Kufri Chipsona te an ni.

KVK Khawzawl te hian alu an chin leh huna an buai loh nan loneitute alu tharchhuah hi Khawzawl KVK Complex-a Cold Storage-ah enge mawzat dah that sak an tum a. Alu quintal 500 tal chu Tawitawzawl zau atang hian thar chhuah an in beisei a ni.

<><><>

MERA PEHLE VOTE DESH KE LIYE

Kum 18 tling thar mai tur te leh tling tawh, Electoral Roll-a hming la ziak lut lo te inziak luta Lok Sabha inthlanah vote an thlak ngei theih nana fuih phurna - 'Mera Pehla Vote, Desh Ke Liye' chu kalpui mek a ni a.

Lok Sabha inthlan vawi 18-na lo awm turah hian a tam thei ang berin vote an thlak theih nan ngawrh taka hmalak a ni a, kawng hrang hrangin mi pawimawh leh challangten mipuite vote thlak turin an sawm a ni.

Ministry of Information and Broadcasting buatsaih 'Mera Pehla Vote Desh Ke Liye' hnuaiiah hian ram chhunga vote thlak thei zinga a tam thei ang berin vote an thlak theih nan ruahmanna siam a ni a, kum 18 tling thar ten vote an thlak ngei theih nan beihpui thlakin a tam thei ang bera theh darh mek a ni.

<><><>

CAA

Union Home Minister Amit Shaha chuan Citizenship Amendment Act (CAA) chu khua leh tui nih theihna chanvo pekna a ni a, khua leh tui chanvo inchnhuhsakna a ni lo a ti. News Agency pakhatin a kawmnaah he thu hi sawiin Union Home Minister chuan CAA chuan Hindu, Buddhists, Jains, Sikh, Christian leh Parsi raltlan Afghanistan, Bangladesh leh Pakistan atanga lo lut te chu khua leh tui nihna a pe dawn a ti a. Citizenship pek an nih hnu chuan inthlanah te pawh ding ve theiin MP, MLA, CM leh Minister thlengin an ni ve thei tawh dawn a ti a. Pu Shaha chuan National Register of Citizens, NRC chu CAA nen inzawmna an nei lo tih a sawi chiang bawk a ni.

Union Minister chuan minority te tan hlauhthawn tur a awm lo tih sawiin CAA chuan khua leh tui lo ni sa tawhte chanvo a lak sak dawn lo a ti a. Tu tan mah kawng khar a nilo tih sawiin Muslim te tan pawh Citizenship hi a la dil theih reng dawn a ti a. Kum 1947 August ni 15 leh kum 2014 December ni 31 inkara India rama lo lutte tan Citizenship hi a dil theih reng a ni a ti bawk.

<><><>

UNION FINANCE MINISTER

Union Finance Minister Nirmala Sitharaman-i chuan Prime Minister Narendra Modia hnuaiiah hun rei tak ngaihthah thawh hmarchhak state ten ngaihpawimawh an hlawh a ti. Vawiina IIT Guwahati-ah he thu hi sawiin Pi Sitharaman-i chuan kum 10 liamta chungin hmarchhakah hmasawanna pawimawh tak tak a thleng a ti a. Prime Minister hmarchhak hmasawanna chu a ngai pawimawh hmasa tih sawiin Union Council of minister te pawhin kum 10 chungin tum 850 lai an tlawh hman a ti a. Hmarchhak chuan hmasawanna turin theihna tam tak a nei a, thalaite pawh an phurin an taima em em a ni a ti a. PM pawhin hmarchhak state te chu India hmasawanna khawlpui berah a ngai tawh a ni a ti a. Sawrkar laipuiin hmalakna a neih reng rengah hmarchhakte hlawnka tur a ngaihtuah tel zel a ni a ti bawk

<><><>

ONE NATION ONE ELECTION

Rampumah a ruala inthlanpui neih theih dan tur ngaihtuahu High-Level Committee chuan vawiin khan President Draupadi Murmu hnenah an zirchianna lehkha an thehluh. One Nation One Election chungchang ngaihtuah tur hian president hlui Ram Nath Kovind-a kaihhruiiin high level committee din a ni a. Vawiina an report thehluh lai hian Union Home Minister Amit Shah, Union Law and Judicial Minister Arjun Ram Meghwal, 15th Finance Commission Chairman hlui NK Singh leh mi pawimawh dangte an tel a ni.

Vawiina an report thehluh hi pheik sing 1 sang 8 leh 626 a chhah a ni a. Ni 191 chung mithiamte leh a kaihhnawih mi pawimawh hrang hrang an kawm hnu a siam a ni.

<><><>